

**UKA2021/137: Uunga siunnersuut:
Nappaatit tunillaassuuttut akiorniarlugit iliuutsit pillugit Inatsisartut peqqussutaata
allannguutaa pillugu inatsisissatut siunnersuut
(Inatsisartut peqqussutaata atorunnaarsinneqarnissaanut ulluata
allanngortinneqarnera)**

Ilaqutariinnermut Peqqissutsimullu Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliaq suliarinninnermini uku ilaasortarai:

Inatsisartunut ilaasortaq Agathe Fontain, Inuit Ataqtigiit, siulittaasoq
Inatsisartunut ilaasortaq Anna Wangenheim, Demokraatit, siulittaasup tullia
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Knud Mathiassen, Inuit Ataqtigiit
Inatsisartunut ilaasortaq Mette Arqe-Hammeken, Naleraq
Inatsisartunut ilaasortaq Jess Svane, Siumut
Inatsisartunut ilaasortaq Mala Høy Kukó, Siumut

UKA2021-imi oktoberip 7.-ani siullermeerinerup kingorna siunnersuut ataatsimiititaliap misissorpaa.

1. Siunnersuutip imarisaa siunertaalu

2020-mi Inatsisartut immikkut ataatsimiinnermini nappaatit tunillaassuuttut akiorniarlugit iliuutsit pillugit Inatsisartut peqqussutaata allannguutaa pillugu Inatsisartut inatsisissaattut siunnersuut akuersissutigineqarpoq¹ (Inatsisartut peqqussutaat ulluinnarni taaneqakkajuttoq “nappaalasoqarneranut inatsit”).

Inatsimmut allannguut Covid-19-p nunarsuarmut tamarmut siaruaanneranik siaruaannerullu taassuma Kalaallit Nunaannut ulorianartorsiortitsineranik tungaveqarpoq,

¹ XM2020/18

piginnaatitaaffinnillu annertuunik arlalinnik, ulorianartorsiortitsisumik taassuminnga iliuuseqarfiginninnermut sakkussanik pisariaqartinneqartunik pisortanut oqartussanut tunniussinissamik siunertaqartunik imaqarluni.

Allannguutissatut siunnersuut² ”piffissaq aalajangersimasup qaangiunnerani atorunnaartussaq”-mik taaneqartartup kingunerisaanik nappaatinut tunillaassuuttunut akiuiniarneq 31. december 2021-imi nammineq atorunnaarnissaanik imaqarpoq.

Tamanna sioqqullugu nappaalasoqarnerani inatsimmik nutaamik Naalakkersuisut siunnersuuteqarnissaat siunertarineqarsimagalarpoq. Inatsisartunut qinersinerup kingunerisaanik inatsisissatut siunnersuut suliassaq eqqarsaataasoq kinguaattoorallarpoq.

Tamatuma saniatigut nappaalasoqarnerani Covid-19-imut akiuiniarnermut inatsisitigut tunngavigineqartut allanngortinneqassappata nappaalasoqarneranut upalungaarsimanermik suliqaartunut ajoqutaaginnarsinnaaneri Naalakkersuisunit nalilerneqarpoq.

Maannamuugallartoq nappaalasoqarneranut inatsimmik nutaamik siunnersuummik saqqummiussinatik allannguutissatut inatsimmik maanna siunnersuutigineqartumik Naalakkersuisut saqqummiussaqarput, nappaalasoqarnerani inatsit ulloq 1. juli 2022-imi tamakkiisumik atorunnaartussanngorlugu (tassa siunnersuutaqaartoq 2020-mi Inatsisartut immikkut ataatsimiinnerminni nappaatit tunillaassuuttut akiorniarlugit iliuutsit pillugit Inatsisartut peqqussutaata allannguutaa pillugu Inatsisartut inatsisissaattut siunnersuut akuersissutigineqarpoq).

2022-imi upernaakkut ataatsimiinnermi siunnersuummik nutaamik Naalakkersuisut saqqummiussinissaat naatsorsuutigineqarpoq.

2. Ilaqutariinnermut Peqqissutsimullu Ataatsimiititaliap oqaaseqaataa inassuteqaataalu

Nunarsuarmi tamarmi tuniluuttoqarneranut atatillugu ataavartumik paasisitsiniaanissaq pisariaqartinneqartoq paasissutissanillu pissarsiniarnermi oqaatsitsigut imaluunniit allatigut aporfeqartoqartarsinnaasoq ataatsimiititaliaq naliliivoq. Tamatuma saniatigut ersarissumik paasissutissiisarnissamik inuiaqatigiinniillu tamanit pissarsiariuminartuunissaanik Naalakkersuisut anguniagaqartuarnissaat, matumani pingaartumik tusilartut, tappiitsut imaluunniit inuit atuarniarnikkut ajornartorsiuteqartut ataatsimiititaliamit eqqarsaatigineqartut nukiit tamaasa atorneqarnissaat, matumani ilanngullugu inuit attaveqatigiittarfiisa

² Nappaatit tunillaassortut akiorniarlugit iliuutsit pillugit Inatsisartut peqqussutaata allanngortinneqarnera pillugu Inatsisartut inatsisissaat nr. 1, 1. april 2020-imeersoq (Tunillaassuinerup pinaveersaartinniarnaneri siaruarnaveersaartinniarnanilu aamma sullissiniarnermi pisariaqartitat il.il. qulakkeerniarneranni iliuuseqartoqarsinnaanermut annertusaaneq)

atorneqarsinnaaneri pillugit ataatsimiititaliaq naliliivoq. Qulaani taaneqartut suliassat pingaaruteqartut aaqiiviginiarneqarnerini susasaqartut akunnerminni suleqatigiinnissat pisariaqartoq ataatsimiititaliaq naliliivoq.

Siullermeerinninnermi siunnersuutigineqartoq tapersorsorluarneqartoq Ilaqutariinnermut Peqqissutsimullu Ataatsimiititaliamit maluginiarneqarmat

- Siunnersuut akuersissutigineqassasoq ataatsimiititaliap isumaqatigiittup inassutigaa
- Periusissiat pillugit, COVID-19-eqarneranut tunngatillugu pilersaarutinik innuttaasut paasissutissilluarneqarnissaasa aammalu susasaqartut akimorlugit inuiaqatigiinnut tamanut sukumiisumik paasissutissiinissaq pillugit Naalakkersuisut suleqatigiinnissaasa qulakkeerneqarnissaa pillugu Naalakkersuisut kaammattorneqassasut.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappasaaniigassanngortippaa.



Agathe Fontain
Siulittaasoq
Inuit Ataqtigiit



Anna Wangenheim
Demokraatit




Mikivuk Thomassen
Inuit Ataqtigiit



Knud Mathiassen
Inuit Ataqtigiit



Mette Hammeken
Naleraq



Jess Svane
Siumut



Mala Høy Kúko
Siumut